

সিনিয়র রিপোর্টার | জাতীয় | 14 May, 2025

বিএনপি নেতা ইশরাক হোসেনকে ঢাকা দক্ষিণ সিটি কর্পোরেশনের (ডিএসসিসি) মেয়র পদে বসানোর দাবিতে লাগাতার অবস্থান কর্মসূচির ঘোষণা দিয়েছেন বিক্ষোভকারীরা।

বুধবার (১৪ মে) দুপুরে গুলিস্তান ডিএসসিসির প্রধান কার্যালয় নগর ভবনের সামনে সমাবেশ থেকে জানানো হয়েছে, বৃহস্পতিবার সকাল থেকে ফের তাদের অবস্থান কর্মসূচি শুরু হবে।

বুধবার সকাল থেকে ‘ঢাকার সাধারণ ভোটারদের আয়োজনে নগর ভবন অবরোধ, আয়োজনে : নগরবাসী’ ব্যানার নিয়ে বিভিন্ন ওয়ার্ড থেকে পৃথক পৃথক মিছিল নিয়ে নগর ভবনের সামনে জড়ো হন তারা।

তারা নগরভবনে মূল ফটকের সামনের সড়কে অবস্থান নিয়ে মানববন্ধন করেন। এক পর্যায়ে নগর ভবনের মূল ফটক খুলে দিলে তারা ভেতরে ঢুকে যান। বিক্ষোভকারীদের একটি অংশ নগরভবনের সিঁড়িতে অবস্থান নিয়ে বিক্ষোভ দেখান। দুপুর পর্যন্ত তারা সেখানে অবস্থান করেন। পরে তারা সেখান থেকে চলে যান।

অবসরপ্রাপ্ত জ্যেষ্ঠ সচিব মশিউর রহমান কর্মসূচি ঘোষণা করেন। তিনি বলেন, ইশরাকের শপথ নিয়ে নানা টালবাহানা করা হচ্ছে। আদালতের রায় ও নির্বাচন কমিশনের গেজেট প্রকাশের পরও জনতার মেয়র ইশরাককে দায়িত্ব বুঝিয়ে দেওয়া হচ্ছে না। শপথের মাধ্যমে ইশরাককে দায়িত্ব বুঝিয়ে না দেওয়ায় কাল বৃহস্পতিবার থেকে ফের লাগাতার অবস্থান কর্মসূচির ঘোষণা করা হলো।

© 2025 TimesToday. All Rights Reserved.

Generated on 29 June, 2025 00:07

URL: <https://www.timestodaybd.com/national/7930212472>